

Efesus

1 ¹Ŋai Pol, Anut ilon yen ak lo, in̄ Jesus Kristus san aposel ago isikatag a. Ŋai an̄ Kristus san tamolpein gun a Efesus taun lo amado dugo Kristus mi awan ari apani dan, an̄sam na girek en ŋigane ipalu da. ²Bai Anut mi idsad Tamad, Tubun ak Jesus Kristus lo ilo panek an̄ lo yen dop, ilo maror amam da ka amado wa.

Urgun san na bar uyan uyan ipalu ya

³Idsad Tubun ak Jesus Kristus in̄anen Taman, Anut mi in̄ yaŋan tabisa wa. Man dugo, id Kristus da tutumani kisaek ak niŋen o, Awan Urgun san bar uyan uyan ak fidian a lak na yen dan ipanad go tuburou ya. ⁴Saen Anut tan ta igane ilasa na dugo, id Kristus ida itumanad o kob ipanad a. An lo saen id in̄ naon na tatur dan, id gun tumado dop, in̄ malan lo man id ai wadan amad tiap itaot mi ago ka tumado wa. ⁵Wagam mi mok, id niŋed o imat an lo, kob ipanad go ŋilaŋal in̄iliad pe in̄san nanun muroun mok tilasa san man Jesus Kristus lo mi a. In̄anen ilon yen ak lo mi, id siŋiren na tau san ilo uyan lo ago igane ya.

⁶Ago dop id in̄san ilo panek siŋaokan geig an niŋen o per tupani wa. Anut san Nanun man in̄san buben mok a. Aria, Nanun an lo ilo panek a ipanad an sen kawan naon tia ipanad a. ⁷Kristus id da tutumani kisaek an niŋen o, in̄anen dar lo in̄ idad in̄iliad dugo idaned aupasek fidian ipare idu ya. An in̄san ilo panek tubun geig ak iri pani a. ⁸Anut in̄anen ilo panek id niŋed o tubun geig ipanad a. An lo maŋau funfun agod ilo safulalek uyan uyan dam ipanad a.

⁹Mel an wagam mi Anut san ilo sou lo mi yen a. Ak man milaen mok in̄anen ilo sou an imianuk yen a. Aria, gamu gug in̄anen ilo sou imianuk an kuai tem igane ilasag id ilod isafulale ya. Kristus lo gup urat an yen a. ¹⁰In̄san ilo sou igo ya, in̄ mel fidian un ad yabip yau gup, nal a kob ipani antep, mel an fidian Kristus lo mi itumani wa. Melmel lak na, agod tan na dam, Kristus paen na mi dien a, agod in̄ mel an fidian sad tamad imado wa.

¹¹In̄ lo dam Anut id ipilianad go id Kristus san mi a. Man dugo, Anut in̄ mel dugo ilasa san niŋen o ilo sou igane dan ago mok mi igane ilasa

da. An niŋen o Anut mel a id niŋed o ilasa wan wagam mi ilon yen ago mi igane ilasa ya. ¹²Maŋ Juda adi malmalan mi Kristus o iloma rumok a. Aria, Anut kob a ipanama yan san fun man, iŋsan girager tubun geig an per mupani dop lo mator a. ¹³Iŋ lo aŋ dam, ru rumok a patum ipasi san bilaluŋ uyanan alon dugo iŋ o ilom rumok a, an lo iŋanen kob aŋane ya. Kob an man iŋsan Awan Urgun nek a id ipanad o promis ru ibol a. ¹⁴Awan Urgun man mel imug Anut ipanad a, amaiak lo id talon ak, murnap id dam mel aenta fidian uyanan ak Anut bageu iganeg yen dan tiŋane wa. An nek ago mi yen yau dop Anut mi melmel an ipanad a. Fun an niŋen o iŋsan girager an tubun mok per tupani geig a.

Pol Efesus niŋedi wo Anut igudani da

¹⁵⁻¹⁶Fun nek an niŋen o ŋai Anut naon na aŋ niŋemi wo ilo uyan ru ŋupani dan, ta ŋiyalis na da. An nek saen ŋai aŋ Tubun ak Jesus Kristus lo ilom rumok an ŋalon ak, agod aŋanem ilo panek a Anut san tamolpein gun ak fidian lo agane dan dam niŋen o ŋalon an, saen antem ŋai fun ŋigane ya. An lo ŋai pempem aŋ niŋemi wo dam ilog isou dugo Anut ŋugudani won da. ¹⁷Idsad Tubun ak Jesus Kristus san Anut, iŋ nek a girager san Taman amaiak ŋai igo ŋugudani da. Aŋanem maŋau iŋ lo yan iganep, kankan milaen ak san ur, agod melmel imianuk yen dan kuai ipani san ur dam aŋ ipanaŋ a. ¹⁸Ŋaisag gadiŋ lo Anut ŋusumianip aŋ lilaman ipanaŋ dop ilom isafulale wa. Agod melmel a aŋane wo igiaŋ go mala nouk amado dan san fun mok alon uyan a. Agod Kristus san filian a girager aman da yan iŋsan tamolpein gun ak ipidinai o promis ru ibol an dam alon uyan a. ¹⁹Taida mi, iŋsan dabai tubun geig ak id ilo rumok tamolpein ilod lo urat igane dan, an dam alon uyanan o ŋai ilog ago yen da. Dabai an san tubun man tubun kasik id tou tigane san tia ya. Dabai a id lo yen dan nek dabai amaiak mi Kristus mateŋ lo ifufuni imasa yan da naon kisaek a. ²⁰Dabai nek an mi Kristus iŋane isudag, kumaen panu lo kalik malan te yak ate, Anut giranen won ak lo iganeg imasi a. ²¹Kristus iŋsen man kiŋ adi, gabman san nao ŋanek tamol adi, gurman fidian, ur fidian dabai amad da yan, tamol fidian a tamolpein malad lo iŋ yaŋad amad da yan dam, an fidian iriŋanai a. An saen gamu mi san tia ya, an saen murnap san dam mi a. ²²Anut iŋ mel fidian Kristus paen na iganeg dien da. Agod ipilianig Kris midaeŋ fidian tan en lo sad gurman igane ya. Ago yan lo binawek uyan uyan ak ipidinai a. ²³Kris tamolpein man Kristus iŋsen tinin. Ago yan lo Kristus iŋsan bunun iŋsen lo awan isag yen dan, Kris midaeŋ fidian ilod lo kuai isip, an lo dop tamolpein fidian dile wa. Man dugo, Kristus iŋsen man mel fidian e tan en lo dumado den tinid iŋanefuteg imado da.

Kristus lo id kumaen tumado da

2 ¹Gubak mi aŋ aupasek agane dugo kubiaeŋ dam ariŋani se ya. Agog an lo ŋutum dam imat ak, ago mi amado na ya. Gug saen

anj aupasek lo ator se yan lo inj iganeg anj kumaen amado ya. ²Nal an lo man anj tan en san kagin saiak lo amado se yak, ago mi ator na ya. Anj ur saian ak sad gurman, timtaen lo itilanig dabai anda itor dak san kagin ari apani se ya. Ur saiak an gamu en inj tamolpein ensauta a awa parsisalek tinadi an, tinidi lo urat saian ak igane da. Man dugo, inj Anut awan ta diri na da. ³Wagam id fidian dam nek inj dida naon kisaek a, ago dugo ilo masai san kagin an mi tiri se ya. Idaned ilo ibol agod tinid san ilo masai dam lo tumado na yan, an ninjen o idsad madok tan en lo man id Anut san tinjæ saiak paen na tumado da. An nek ibol tamolpein fidian tan en lo ditor dak, ago mi a. ⁴⁻⁵Ak gug, Anut id Kristus da itumanad go kumaen pempem san ipanad a. Man dugo, Anut inj ilo mujanek tinin lo man awan isa geig a, an lo inj id o tubun mok imat an ninjen o, gidad, idsad aupasek lo ntud imat yau bo man, kumaen ipanad go ntud kumaen dilasa ya. (Anut san ilo panek lo mi anj patum ipasi a.) ⁶Agog Anut id enti a Kristus da tutumani an inj da materj lo ifufunad go kumaen tilasa ya. Ago dugo inj da sisem mi kumaen panu lo taug injanen badim fo tumasi a. ⁷Inj ago igane yan san fun man, saen murna murna ilasa san an lo gup injan ilo panek tubun geig an id naod na kuai tem igane ilasa dop pempem tile wa. ⁸Man dugo, Anut san ilo panek lo mi patum ipasi san man anjam ilo rumok lo mi a. Mel an ansem ta agane na ya. Tia, Anut sen kawan geig anj ipanaj a. ⁹An man anj urat agane yak san naon tia ya. Kabelan tamol ta an lo na sen yanan yabisa banau. ¹⁰Man dugo, id man Anut san banin aban a. Inj id Jesus Kristus lo idirad go foun tilasa ya. An fun man id kagin uyan uyan ak mi tigane wo wagam mi Anut ikubune panad an mi turi wa.

Id Kristus lo kisaek tilasa ya

¹¹⁻¹²Amaiak ninjen o anj imug mi Kristus lo asau mi amado se yan ilom isou wa. Tamol a muluj san kulob dijanen yan, inj anj ninjemi wo tamol muluj san tia yak ago dubol da. Gidad ago durupaijan bo man, kagin an tamol sad kagin sed tinid lo digane da, an man banid san mel mi a. Saen an lo man anj Isrel sad tumanek lo naom tarej dufou se ya, agod Anut san promis ru Isrel adi ipidinai an ninjen o anjaonj a. Rumok, anj mel uyan ak ta ninjen o mala naok aganeg ta amado na ya, tia, anjam madok tan en lo man, Anut tia yak igo wonj amado se ya, an ninjen o dam ilom isou wa. ¹³Rumok, imug mi anj asau mi amado se ya. Ago gug gamu man Kristus san dar lo anj injiljan go apalu ya. Anj Jesus Kristus ida atumanig, lo gamu en anj Anut sumeikan mok sinjiren na amado da. ¹⁴Man dugo, Kristus injan man idsad ilo maror. Anj alonj ak, tempel ilon lo tarej ta yen an lo gilek yen a, tarej an Juda adi senamo idirai dugo Juda tia yan dam senamo idirai a, an lo turej an san siai tumanek malan uraru an ilod lo yen a. Aria, gamu id ilod kisaek tilasa wo Kristus inj siai an san

tarenj irube yaug itout a, ago yan lo tumanek uraru an iganeg afon kisaek tilasa ya. ¹⁵Insan materj lo Moses san ru kubiaen fidian agod ru kagin fidian ilon lo yen an dam ifini imat pasik a. An lo na Kristus injsen Juda tamol in Juda tia yak da injal go itumanaig, an lo tamol foun ak kisaek mi ilasa ya. Dal an lo maror igansi a. ¹⁶Kristus tinin kisaek amaiak lo, tamol wagam an uraru mi itumanaig, Anut san turan mok on dilasa ya. An san dal man Kristus aigim fo imat amaiak lo mi a. Dal nek kisaek an lo mi siai a nug lo yen an, Kristus igane itout a. ¹⁷In bilalun injaneg an a asau mi amado dan sam na ipalu ya, agod man Juda e sumsumeik mumado den dam mi a. Bilalun maror san an id fidian naod na ifulale ya. ¹⁸Gamu in lo, id fidian geig Awan Urgun kisaek an lo mi dalawan ipasi panad dop Bai sijiren na tilasa wa.

Id Anut san ab gun ak igo wonj tumado da

¹⁹Gamu en an tamolpein naom foun ak igo wonj ta amado na ya. Tia, an Anut san tamolpein gun ak dida naom kisaek mi a, agod an injsan warou mok ilon lo dam amado da. ²⁰An Anut injanen ab igo wonj isuse da. Man aposel, profet dida man, Anut ab an san bag igo wonj igunama ya. Jesus Kristus injsen man ab an san bag tamol. ²¹Ab an san tatu fidian man Kristus lo mi isasau a. Ago dop ab isuse yan lo ab kisaek gun ak Anut ilon lo imado san ilasa wa. ²²Kristus lo dam, in injilan go an ab gun an da ibateg kisaek mi an ab an tinin aenta igo wonj amado da. Amaiak ninen o gamu Awan Urgun injsen Anut naon injaneg ab ante imado da.

Anut san ilo sou imianuk yen an kuai te ifulale ilasa ya

3 ¹Fun an ninen o, naj Pol, an tamolpein a Juda tia yan ninemi wo Kristus san subanek tamol numado da. Aria, Anut nugudani wo da, ak gug ru ta jurupaian o da. ²An dag ru en alon boi. Anut injsen injanen ilo panek naj banig lo iganeg nuwae panan o urat njigane da. ³Nai imug girek en njigirek lo jurupaian a, Anut sen injsan ilo sou mianuk an, an naj irupaia g a. ⁴Saen an ru en asuti dop, igo ale gup, Kristus san ru mianuk ak an naj njalon fufei a. ⁵Saen imug imug ipalu se yan lo man, Anut in ru imianuk an tamolpein tan en san naod na kuai te ta igane ilasa na ya. Ak man gamu en Awan Ur lo yak ninen, in man aposel injanen profet adi dam, injsen ru imianuk an fun ifulaleg kuai tem ilasa dugo dulong uyanan a. ⁶Ru mianuk an man igo ya, an gob adi Juda tamolpein dida sisemi Anut san bar uyan uyan ak anjane wa. An in dida atumani an lo tinim kisaek alasa ya. Agod melmel a Anut san promis lo tinjane wo ibol an, id sisem tinjane mok a. An bilalun uyanan Anut Kristus lo ipanad an lo ilasa ya.

⁷Bilalun uyanan en ninen, Anut ipilianag go injsan bilalun tamol nilasa ya. An injsan ilo panek a sen kawan naon tia njigane yan iri pani a.

Rumok, ijanen dabai tubun geig ak lo nai iginiag go tamol naok ago yak nilasa ya. ⁸Gidad, nai Anut san tamolpein lulunad lo, tamol kawan ak igo won jumado bo man, in nai ilon ipanag go urat emaiak ipanag a. Urat en man, Kristus san bunun uyanan a talon san id ta idaisuda na yan nigen o, gob adi naod na kuai te nabol ilasa dop dulong a. ⁹Anut san ilo sou saen milaen mok imianuk yen se ya. Ak gug Anut a mel fidian igane yan, ijanen ilo sou an kuai tem ilasa wo ago ilon yen da. Ago dop tamolpein fidian inisan ilo sou imianuk an dile dulong a. Agod in urat an dam nai ipanag a. ¹⁰Rumok geig, Anut in kulob a inisan tamolpein lulunad lo igane ilasa yan lo, ijanen manau funfun naon senamo geig an iganeg kuai isi a. Ago igane yan lo, ur sad gurman in ur fidian a dabai amad da yan dida lak na ditilani dutor dan, Anut san manau tubun geig ak an ikubiai pidinai dop dile wa. ¹¹En man inisan ilo sou saen fidian san a. An lo man gamu Jesus Kristus idsad Tubun ak lo Anut san ilo sou an nunon ilasa ya. ¹²Id Kristus o ilod rumok dop, id tarer san tia ya. Id an lo talon uyanan ak Kristus in mi idsad dal. In lo gup id Bai sirigen na tilasa wa. ¹³Ago yak nigen nai gamu en jurupaian da, madai e an nigeni wo nisini den nigen o ilom muruan amoi. Man ata wo? Madai en man ananem girager tubun a.

Pol Efesus tamolpein dutur sakar san nigeni wo igudani da

¹⁴Fun an nigen o nai Bai naon na turug nusalowi a. ¹⁵In warou fidian lak na yak in tan na yak dida dumado dan sad Tamadi a. Man nigen mel fidian an inisen mi yanad ipidinai a. ¹⁶Nai turug nusaluwig igo nugudani da, Anut inisan girager san binawek wei mi an an nuturen ilon lo ka igane wa. Ago dop an lo inisan Urgun idiran pe tamolpein nuturen dabai tubun mi ak amam da ago amado wa. ¹⁷Ago dop Kristus sen ananem ilo rumok an lo nuturen ilon lo ka imado wa. Nai igo dam nugudani da, ilo panek kagin an man ananem kagin naok naok fidian san fun mok a. ¹⁸An lo an Anut san tamolpein fidian dida sisem, Kristus ijanen ilo panek an alon uyanan san, an ikawilami wa. Ago dop man an ka alon uyanan ak, Kristus ilon ipanag san kagin man tubun mok, yang milaen geig, isida yang lak na kasik, idu yau geig a. ¹⁹Rumok, id ijanen ilo panek an talon pasik anen ta idaisuda na ya. Gug gidad, nai nigeni wo Bai nugudani on da, an inisan ilo panek an alon uyanan a, ago dop man Anut san bunun uyanan fidian ilon lo awa na geig an, an lo dam ka awan isa wa.

²⁰Anut in mel dugo onsa ilo sou lo yen dan, agod mel dugo nigen o sumiani dan dam, irinanip, suguan dam ka ipano wa. Inisen mi ijanen dabai id ilod lo urat igane dan lo, urat an fidian igane wo idaisuda geig a. ²¹Ago yak nigen o, inisan tamolpein lulunad lo, Kristus lo dam, Anut san girager kuai tem yen a, gamu yen ak, nal pempem nek agom yen yau a. Rumok.

Id Kris fidian ilod kisaek a

4 ¹Ŋai Pol, Tubun ak san subanek tamol, ŋai igo ŋurupaianj da. Madok a Anut ninen o igianj an ari apani wa. Ago dop kagin a inŋsen ninen o ilon yen dan lo mi itaot ator o ago ilom ŋabisa da. ²Anj sem ibianj adu dop tamolpein maror amami ak igo woŋ amado wa. Saen anj ilo muruan dupanaj dop niŋedi wo anj ilom wananan amoi. Anj anen anen nug ilon apani wa, ago dop muruan a nugnug lo akubiani dan, gidad asini wa. ³Aŋanem ilo kisaek Awan Urgun lo yan, maror nek a ituanaj iso yan lo mi maeg aganep kagin apani wa. ⁴Id Kris adi tinid kisaek, agod Awan Urgun dam kisaek a. Nek ago mi, mala nouk kisaek nek a Anut ninen o igianj ago mi a. ⁵Tubun en man kisaek a. Ilo rumok san kagin dam kisaek a, Kris filanek dam kisaek a. ⁶Anut dam kisaek mi a, id ilo rumok tamolpein fidian idsad Tamad a. Inj id fidian fufo lak na ya, agod id fidian anen anen ilod lo urat igane da. Agod inj id fidian tinid lo imado da.

⁷Ak man Kristus ilo panek lo mi id anen anen inŋsan ilon yen ak iri panim, inŋsan lou funfun id ipanad a. ⁸Amaiak ninen o Anut san ru buk lo yak igo ibol,

“Saen inj lak na isuda yau man,
tamolpein a wei mi niŋed banid subanek lo yen se yan inŋiliai go
dida diau a.

Ago dugo inŋsan lou panek funfun an tan san tamolpein ipidinai
a.”

⁹(“Inj lak na isuda yau” ru an fun dugo yak i? An fun man inj imug mi tan en lo ipalu idu ya. ¹⁰Enti inj a tan na idu yau amaiak, inj mi did aben fidian dam irinanaig isuda yau an lo, inŋsen mi mel fidian ilodi tinidi lo inj mi awan isa wa.) ¹¹Inŋsan lou panek man igo ya. Ta aposel urat, ta profet urat, ta bilaluŋ urat, ta matu urat, aenta girek maŋau urat lo iginiaig dumado da. ¹²Anut san tamolpein man Kristus tinin. Aria, lou funfun amaiak ipidinai an lo man, Anut san tamolpein urat digane san dal dukubune wa. An lo man, inj anen anen Kristus san urat biabi ka digane wak, agod inj Kristus san tinin dabai dupani wa. ¹³Urat en ka yau woŋ dop id fidian sad ilo rumok lo, agod idsad maŋau a Anut Nanun ninen o an lo dam, id tamolpein itumanad pe kisaek tilasa wa. An lo dop id Kristus san kagin lo busumak sad tou tiŋanep tumado wa. Aria, busumak adi sad bunun a tiŋane wo maeg tigane dan san tou man, bunun an fidian Kristus lo mi yen da.

¹⁴Wagam id nanuk onj tumado na ya, id wog igo woŋ beig san bururuk gidigidad iriad ila iso se ya. Gug id Kristus onj tilasa wo dop, id afon nanuk onj ta tumado na wa. Man dugo, imug mi kagin en id Kris tamolpein luluŋad lo yen a. Tamol ta supalek ru nam pitejanek foun foun ak dupanad a. Pitejanek an Kris tamolpein iduduwai dugo ilo sou uyan

ak san dal ifutani da. Tamol an dal funfun lo dirawai dugo dal saian ak lo didirai diau da. Teig taog, id fon ago ta tilasa na wa. ¹⁵Tia, id ilo panek san dal tiri dan lo ru rumok ak mi kuai tem tabol ilasa wa. Ago dop id nek ibol nanuk igo wonj titalbusi uyanan a. An lo dop kagin fidian lo titalbusip, id Kristus igo mi tilasa wa. Insen mi idsad gurman. ¹⁶Id Kris tamolpein man Kristus san tinin. Kristus itirnad dugo inanen tinin id dabai tupani da. Tinin san boi anen anen man tinin an da isatuanig yabig dabai go kisaek mi dipinig dien da. Tinin an san boi anen anen insonianed urat kisaek kisaek atem digane da, an lo tinin fidian italbusip ilo panek lo dabai inane da.

Ajanem madok san dal

¹⁷Tubun en lo naj ru kagin e jurupaian den aj ari apani wo tubun mok nududuwanj da. Aj afon gob adi sad dal lo ta ator na wa. Man dugo, insad ilo sou an kawan mok a. ¹⁸Insad dulong man tidom tubun yafutani a, agod Anut san madok ninen o man in ibol tamol asau ak igo wonj a. Man dugo, dijaonj go dumado da. Insad ilod pat igo wonj dabai geig an lo Anut ta dulong na ya. ¹⁹Kagin itaot ak ninen o man kagin ta dupani na ya, an lo ilo masai san kagin an mi diri dupani da. Kagin fidian nun aman da yak lo diladu san ninen o mi yaes isofutanai da. ²⁰Ak man aj dal an lo Kristus ninen o ta alon na ya! ²¹Aj dag Jesus ninen o dupitejananj dugo ru an kagin ta apani na ya. Taida mi, Jesus ilon lo mi ru rumok yen da. Aria, an rumok tap, naj gamu jurupaianj da, ²²aj ilom wagam ak san turenj an abisei wa. An ajanem madok wagam ak san mel mi a. Ilo masai san kagin an ilom inane dop, sem nudum asue dop lo mel fidian a saian ak an mi agane wa. Amaiak ninen o gamu en aj kagin wagam an akudip yau a. ²³Ago dop an lo aj ntum in ajanem ilo sou fidian da ka foun dilasa wa. ²⁴Ajanem ilom foun a Anut sen igane ilasa pananj an mi ajanep aj tinim ilon lo agane wa. Ago dop ilom foun ak san bunun in Anut san bunun da naon kisaek a, an lo aj ilom ilon lo kagin itaot ak in kagin gun ak da awan isa wa.

²⁵Amaiak ninen o aj rawek kagin an amoi. Aj fidian ru rumok ak mi Kris aenta naod na arupidai dop dulong a. Man ata wo, id fidian tinik san boi anen anen amaiak san tinik kisaek ago tumado da. ²⁶Aj ka talpein ta ninen o ilom saian a. Ak gug kagin an ale funi dop aupasek lo ta idiranj au na wa. Tia, kagin agane wa, saen ad gamugo idiau dop, ajanem ilo saian nug ninen o an akubunep itout a. ²⁷Agod aj dal ta Satan ilom inane wo ta apani na wa. ²⁸Ta in gumagam tamol man fon ta igam na wa, tia, in urat igane wa. In urat uyan ak mi banin lo igane dop, an lo tamolpein a melmel lo katuk ad go dumado dan binawek ka ipidinai a. ²⁹Aj ru saiak binawek aman tia yan awam lo ilasa amoi. Tia, ru uyan ak mi abol ilasa wa, ru an ka tamolpein dulong dop lo dabai ipidinai a. Gidad muruan

dugo dugu tamolpein dile dan, ru a ibinawai san an mi abol ilasa wa. Ago dop tamolpein a ru an duloŋ dan, aŋ Anut san nao ŋanek igo woŋ iŋsan ilo panek apidinai a. ³⁰Aŋ Anut san Awan Ur ilo muruan apani amoi. Awan Urgun iŋ man Anut san kob aŋ ilom ilon lo igane ya, amaiak lo Anut iŋanen tamolpein iŋiliai san nal an lo aŋ dam sisem iŋiliaŋ a. ³¹Aŋ ilom lo siai kagin, tiŋae saian san kagin, nug abubuŋani adiri san kagin, uf ru san kagin, agod dumadam kagin dam, an fidian akudaip diau itout a. ³²Aŋ nug niŋen o bubem kisaek ak lo, tini misek san kagin lo dam atur sakar a. Nek ibol Anut iŋ Kristus log aŋanem aupasek ipare idu yak ago mi, aŋsem dam nug niŋen o ago agane dop ator a.

Lilaman lo tator da

5 ¹Ago yak niŋen aŋ gidad kagin a Anut iŋsen igane yan mi ari apani wa, man dugu, aŋ iŋsinanen nanun muroun mok amado da, agod iŋ tubun mi ilon ipanaŋ da. ²Aŋ aenta ilom apidinai san tureŋ lo mi ator a, nek ago mi Kristus ilon ipanad an lo iŋsen tinin ibisei panad a. Iŋ man nek ibol bilelek a Anut dupani wo yai digane dop iŋsan mumalun iwen siŋaokan pe lak na yaup Anut ilo uyan ipani san igo woŋ a.

³Aria, aŋ jeit kagin lo, kagin nun anda yak fidian an lo dam aladu amoi. Agod aenta sad melmel niŋedi wo malam isi amoi. Aupasek naok ago yak man Anut san tamolpein lulunaŋ lo yen san man aben tia ya. ⁴Aŋ ru nun, ru ŋiŋeo, ru kukok a ilo saian igane ilasa yan dam awam lo ta ilasa na wa, man dugu, kagin naok an uyan tia ya. Tia, aŋ gidad Anut per apani wa. ⁵Aŋ mel en aloŋ uyan ak i? Tamolpein ensauta a jeit kagin digane dan, kagin naok naok nun anda yak digane dan, agod tan en san melmel niŋedi wo yaes ifug ditor dan dam, Anut iŋ Kristus da sad kumaen panu lo ta mok diladu na wa. (Talpein a tan en san melmel niŋedi wo yaes ifuni dan, iŋ talpein a tubud sewak sad ubou ad ile dan da naon kisaek mi a.) ⁶Kagin agane wa, kabelan talpein ta ru kawan ak lo ŋudum dusue dop lo aŋ kagin saiak agane banau. Kagin naok nek an lo dop Anut tiŋaen saian pe iŋ ai wadan saian geig ak iganep awa parsisalek san tamolpein an sad tinid fo ikulmaek idu dop ka disini wa. ⁷Ago yak niŋen aŋ tamol naok ago yan dadi nug turan oŋ ta ator na wa. ⁸Man ata wo? Imug mi aŋ tidom tubun lo amado se ya. Gug gamu en Tubun ak aŋ lilaman lo iginiaŋ a, an niŋen o aŋ lilaman san tamolpein igo mok ator a. ⁹Man dugu, lilaman iŋ nuŋon uyanan ak mi igane ilasa da, kagin uyan ak, kagin itaot ak, ru rumok ak mi tabol san kagin dam, an mi id tigane wa.

¹⁰Kagin uyan nek a aŋ agane san niŋen o Anut ilon uyan dan mi ale wo maeg agane wa. ¹¹Tidom tubun san kagin funfun lo sem ta iginiaŋ aladu na wa. Kagin naok an man iŋ nuŋon ifu uyan san tia ya. Tia, saen tamolpein kagin saiak digane dugu aŋ ale tap, kuai tem abubuŋanai a.

¹²Man dugo, kagin nek a mianuk lo digane dan man saian geig a. Rumok, talpein ta kagin an niŋen o malak malak ibol tap, miai tubun mi ifuni wa. Ago bo man, iŋ gidad malak malak ibol ilasa wa. ¹³Sul man aban isapudade dop mel ta iŋ sul san lilaman lo ilasa dan tamolpein dile wa. Amaiak niŋen o mel saian ta lilaman lo kuai isip tamolpein dile dulon pe “an saian ak” ago dubol a. ¹⁴Fun an niŋen o ru e ilo rumok adi dubol den talon a,

“On tamol a wen dan, masa.

On mutou lo wen dan masa dop,
Kristus iŋ lilaman ipano wa.”

¹⁵Kagin agane dop ananem tureŋ bitinaek lo aganep ale wa. An tamolpein kankan amad tia yak igo won tureŋ abi amoi, tia, tamolpein kankan amad da yak igo won ago mi ator a. ¹⁶Saen abidani amoi. Saen gamu e Anut ipanaŋ dak lo, kagin uyan uyan ak mi agane wa, man dugo, saen gamu e id lo tumado den man saen saian a. ¹⁷Fun an niŋen o an ŋiŋeo kagin lo atur dan amoi. Tia, akubianip ale, Tubun ak san ilobol an man ata mel ak i? An ale alon dop ari apani wa. ¹⁸Agod an tubun mi aluk dop, aburaŋau banau, man dugo, kagin naon nek an an muruan ipanaŋ a. Tia, Awan Urgun an mi an tinimi ilon lo awan isa wa. ¹⁹Ago dop an ru girek Isrel bar san buk lo yen dan lo, ubou san bar lo, Urgun san bar lo dam nug lo anŋeŋ a. Ananem tinim ŋutum fidian lo Anut ilo uyan apani wo bar abi wa. ²⁰Agod nal fidian lo, mel fidian niŋedi wo dam, an idaned Tubun ak Jesus Kristus yaŋan lo, Bai Anut per apani dop ilo uyan apani wa.

Pein iwon tamol da

²¹An anen anen nug awan paen na amado wa. An kagin ago agane san fun man, Kristus yaŋan lak na mok asini wo ago ilom yen a. ²²On pein, onane tamol paen na mado wa, nek ibol on dam Tubun ak paen na mado dak igo won a. ²³Man ata wo? Iwon pein inŋan gurman man iwon tamol a, nek ibol Kristus iŋ man inŋanen tamolpein fidian sad gurman igo won a. Inŋan tamolpein man inŋan tinin, agod iŋ man inŋanen tamolpein sad patu pasek tamol. ²⁴Amaiak niŋen o, nek ibol Anut san tamolpein iŋ Kristus awan paen na dumado dak ago won, on pein mel fidian lo onsigane tamol san awan paen na mi mado wa. ²⁵Aria on tamol, onane pein ilo pani wa, nek ibol Kristus inŋan tamolpein ilon ipidinaidugo sen tinin ibisei pidinaig mater lo idu yak ago ya. ²⁶Ago yan lo inŋanen ru nam, nek ibol you igo won, inŋan tamolpein ifulanaig an lo gun idirai dilasa ya. ²⁷In ago igane yan lo dop inŋanen tamolpein siniren na girager amad da dupalup naon na dutur a. Girager an tinin tubulak tia yak, mel ta saian nek ago tia yak dam ago mi wa. Tamolpein an man gun ak, agod nun tia yak nek ago mi dumado wa. ²⁸Ak niŋen o an tamol dam, nek ibol

sem tinimi kagin apani dak igo wonj, anjsjanem iwom ilom apidinai a. Ta injsan iwon pein ilon ipani dan, in sen tinin ilon ipani da. ²⁹Id talonj ak, tamol ta injsen tinin lo ager ta igane na da. Tia, in sen tinin ananj ipani dugo kagin ipani uyanan da, nek ibol Kristus injsen injanen tamolpein kagin ad igane dak ago wonj a. ³⁰Man ata wo, id anen anen man Kristus san njen banin malan, mel ago yak injsan a. ³¹Anut san ru girek lo yan igo ibol. “Tamol in tinan taman ibisawaip iwon dam nug dipinip dutor a. An lo uraru an tinid kisaek ak igo wonj dilasa wa.” ³²Ru an ilon lo ru fajan tubun mi yen dak talonj san ta pasauman na ya. Gug najsag ilo sou lo, ru an Kristus in sinanen tamolpein da ninedi wo ibol a. ³³Gug gidad, an tamol anen anen anjanem iwomi ninedi wo amat a, nek ibol ansem ninemi wo amat dak ago wonj a. Pein dam anjanem tamol kagin ad agane dop paed na amado wa.

Nanuk tinan taman da

6 ¹Nanuk, an anjanem tinam tamami awad mi ari apani wa. Anj Tubun ak san a, an njen o kagin an ago agane wa. Man ata wo? Kagin an uyanan mok a. ²⁻³Ru kubiaen ta promis aman da yak Moses san girek lo yen da. Ru kubiaen an man, kubiaen a malan te amaiak ilon lo promis yen da. Ru kubiaen an igo ibol a, “On onjane tina tama sad yanjadi lak na mok sini wa. Ago gane tap man, on madok uyan ak njanep, saen milaen tan en lo mado wa.” ⁴Bai adi, an anjanem nanuk abiai dudu saian geig san kagin lo, ilo saian apidinai man amoi. Tia, an gidad pitejanek uyanan a Tubun ak san dal iri pani dan mi apidinai a, agod in sed tinid diabi idu dop lo Tubun ak san awan paen na dumado san, an dam akubiai pidinai dop dulonj a.

Urat bigabeg injaned tirnek tamol dadi sad ru

⁵Urat bigabeg adi an anjanem titianek tamol tan en san awad mi ari apani wa. Anj ninedi wo dam arer a. Anj pempem anjanem urat njen o ilo sou kisaek a maeg apani dan lo urat ago mi agane wa, nek ibol an Kristus njen o mi urat agane dan igo wonj a. ⁶Anj saen injsad leil lo amado dan lo mi, ilod anjane wo sad awad ari apani man amoi. Tia, an Kristus san urat tamol igo wonj urat a dupananj an agane wa, man dugo, Anut ninemi wo ilon ibol man an tinim bubem fidian lo ago agane wa. ⁷Anj ilo uyan lo urat agane pidinai a, urat a agane dan tamol gidad san tia ya, urat an man Kristus san a. ⁸Man dugo anj alonj uyan ak, talpein ta in mel ta uyanan ak igane tap, injsan urat naon man mel ta uyanan ak naon kisaek Anut banin lo ipalu dan an mi injane wa. Gidad in bigabeg boi, tia, injsinanen ilobol lo itor san tamol boi, uraru an sad urat naon man kisaek a. ⁹Anj titianek tamol, anjanem bigabeg adi kagin uyan ak mi in lo agane wa. Ilo rer san kagin in lo agane amoi. Tubun ak in

lak na imado da, in̄ an̄sam Tubun a, agod in̄ dam in̄sad Tubun a. Agod in̄san leil lo man, id fidian tou kisaek mi a.

Kris adi in̄ yu tamol igo woŋ dumado wa

¹⁰Aria, ŋai gamu ru wadan ŋurupaian̄ da. An̄ Tubun ak san dabai sakar geig ak lo atur sakar a. ¹¹Biouŋ a yu tigane san an fidian Anut id ipanad la ya. An mi an̄ tinim lo asisi isap Satan san rawek kagin fidian abiani dop wagai aganep atur sakar a. ¹²Man dugo, id tamolpein niŋedi wo ager ta tigane na da, tia, ur gurman adi, ur tirnek adi, ur dabai amad da a tidom tubun gamu yen dan lo, tan en san tamolpein ditirnai dak, ur sisaiak kagin saian geig ak san, agod lak na dumado dutor dan dam, amaiak niŋedi wo ager tigane da. ¹³Ago yak niŋen o Anut an̄ yu agane san biouŋ fidian ipan̄an̄ an aburou, saen saian ipalu dop, an̄ nek an lo dabai pe atur dop yu agane wa. Saen yu itout dop, nek ago an̄ dabai amam da atur a. ¹⁴An̄ kam lapik galim te afouti wa. Lapik an man ru rumok igo ya. Aenta man, titirem te siot kapa ak agane wa. Siot kapa an man kagin itaotan ak igo woŋ a. ¹⁵Ŋiemi te sendal agane wa. Sendal uraru an san fun, an̄ ilom tinim imasap maror san bilaluŋ uyanan an asini ator san ak igo ya. ¹⁶Kagin fidian an, sad malan te man ilo rumok mi a. Nek an mi dumui igo woŋ, abi sakar pe Satan in̄san yu malan yai balen anda yak isou ipan̄an̄ dop atartitanip asoufunip imat a. ¹⁷Taidam, patu pasek a Anut ipan̄an̄ an kitikat sakar ak igo woŋ an̄anep kabuŋam fufo agane wa. Agod sabiri a Awan Urgun san an dam abi wa. An man Anut san ru. ¹⁸An̄ saen fidian lo, gidad mel dugo ilasa yan, Awan Urgun san dabai lo agudani wa. Man niŋen o nal fidian malam ipuk pe ta ayalis na wa, ago dop Anut san tamolpein fidian niŋedi wo agudani wa.

¹⁹An̄ gudanek lo mi Anut asumiani dop ŋai binawek ipanag a. Ŋai ilog igo yen da, an̄ agudani dop, Anut in̄anen ru ŋai awag lo igansi wa. Ago dop ŋai ŋarer se yan ŋibiseip, an lo Anut san bilaluŋ uyanan a imug mi imianuk go in̄ lo yen gug gamu kuai isi an mi ŋabol ilasa wa. ²⁰In̄san bilaluŋ niŋen o ŋai man Anut san nao ŋanek tamol, funatek lo ŋumado da. An̄ gudanek lo Anut asumiani dop in̄ dabai ipanag dop tamolpein naod na ru dabai mok ŋabol a, man dugo, kagin an ŋigane wan Anut malan lo man uyanan a.

Ru wadan

²¹Tikikus urat e ŋigane den, agod muruan dugo ifunag den niŋen o an̄ irupaian̄ dop alon̄ a. In̄ Anut san urat lo man ŋaisag urat kisaek a, agod ŋaisag bubeg mok a. ²²Amaiak niŋen o man̄ mel dugo dugo mile dan niŋen o alon̄ uyan o ŋai Tikikus ŋigane siŋirem na ipalu da. An lo an̄ ilom dabai ipani wa.

²³O teig taog, ŋai nek e Anut ŋugudani den, in̄san maror ipan̄an̄ a, agod ilo panek in̄ ilo rumok da sisem, Bai Anut san na ipalug, Jesus Kristus san na dam ipalu yan dupan̄an̄ a. ²⁴Anut ka in̄san ilo panek an iwali idu dop, tamolpein ensauta a in̄sad ilo panek imat san tia yak Jesus Kristus dupani dan ituanai dop in̄ lo yen a. Rumok.